

01 NOV 2002

Puteri-Azalina

PUTERI UMNO IKRAR JADI LANDASAN POLITIK WANITA MUDA MELAYU

KUALA LUMPUR, 1 Nov (Bernama) -- Puteri Umno, yang mengadakan perhimpunan pertamanya hari ini, akan dibina sebagai landasan politik untuk generasi muda wanita Melayu, kata ketuanya Azalina Othman Said.

"Puteri akan kita bangunkan sebagai institusi pendidikan politik untuk wanita Melayu muda," katanya ketika berucap pada perhimpunan itu yang dirasmikan Presiden parti Datuk Seri Dr Mahathir Mohamad di Dewan Merdeka, Pusat Dagangan Dunia Putra di sini.

Azalina, yang menang tanpa bertanding sebagai ketua pergerakan itu, berkata Puteri Umno akan digilap untuk membina identiti wanita Melayu yang dinamik, progresif, bertiangkan agama dan bersendikan adat.

Katanya dalam memenuhi hala tuju itu, pergerakan itu memerlukan panduan, nasihat dan pandangan daripada para pemimpin parti, Pemuda dan Wanita Umno serta masyarakat termasuk pentadbir dan teknokrat serta ulamak.

Timbalan Presiden Umno Datuk Seri Abdullah Ahmad Badawi, naib-naib presiden Datuk Seri Najib Tun Razak, Tan Sri Muhammad Haji Muhamad Taib dan Tan Sri Muhyiddin Yassin serta Ketua Pemuda Datuk Hishammuddin Tun Hussein turut hadir. Puteri Umno mempunyai 93,435 anggota.

Azalina berkata Puteri Umno akan dijadikan sebagai laluan dua hala di antara generasi muda dengan yang terdahulu.

"Kami sedar kail kami panjang sejengkal, sedangkan lautan terlalu dalam. Segala panduan dan segala nasihat, segala teguran dan segala pandangan amat dihargai," katanya.

Beliau berkata gelanggang politik yang diceburi Puteri Umno adalah suatu pengalaman baru dan menuntut kecekalan dan ketabahan.

Katanya dalam tempoh 18 bulan penubuhan jawatankuasa penaja telah memberi pendedahan dan memberi pengalaman yng bernilai kepada setiap anggota Puteri Umno dalam menunaikan amanat perjuangan parti.

Pergerakan ini mempunyai pendirian yang jelas dari segi peranan strategik yang dapat dimainkan sebagai pelengkap kepada Pergerakan Pemuda dan Wanita, katanya.

-- BERNAMA

FA AZZ RON